



Sve informacije će se slivati na jedno mjesto

# Počeo rad grupe protiv terorizma

Prijedlogu odluke o uspostavljanju Koordinacionog tijela za borbu protiv terorizma protivi se vlast iz RS-a, uz obrazloženje da bi to tijelo preuzelo nadležnosti drugih nivoa vlasti

**O**perativna grupa za borbu protiv terorizma jučer je zvanično počela sa radom. Ta odluka je donesena na sastanku Udarne grupe za borbu protiv terorizma, koji je jučer održan u Tužilaštvu BiH.

- Glavna vijest je da je Operativna grupa, policijski službenici koji direktno rade na terenu u borbi protiv terorizma, krenula sa radom. Njeno sjedište će biti u Direkciji za koordinaciju policijskih tijela. Policijske agencije koje učestvuju u borbi protiv terorizma dat će po jednog svog predstavnika - kazao je nakon sastanka federalni ministar unutrašnjih poslova Aljoša Čampara.

## Razmjena podataka

Ministar unutrašnjih poslova RS-a Dragan Lukač naglasio je da odluka o formiranju grupe postoji od ranije, ali da je tek sada zaživjela.

-U tu grupu trebali bi da se slivaju svi podaci iz BiH vezani za terorizam, tako da bi sve agencije imale adekvatan podatak i mogle reagirati na vrijeme - izjavio je Lukač.

Na sastanku je bilo riječi i o određenim izmjenama kada je u pitanju rad Udarne grupe za

**Policijske agencije koje učestvuju u borbi protiv terorizma dat će po jednog svog predstavnika**



Glavni tužilac BiH Goran Salihović predsjedavao sastankom

borbu protiv terorizma.

- Predložili smo izmjenu naziva Udarne grupe, da se zove Koordinaciona grupa ili Koordinaciono tijelo. Dogovorili smo se i da funkcionalno budu navedene osobe, a ne imenom i prezimenom. Razgovaralo se i o finansiranju, ali to ne mora značiti da će to finansirati Vijeće ministara, nego sve policijske agencije zajedno i da se striktno držimo ustavnih i zakonskih ovlaštenja. Prema Zakonu o krivičnom postupku i Krivičnom zakonu, svim istragama rukovode nadležna i resorna ministarstva, tako da tu ne bi trebalo biti dodatnih problema - objasnio je Čampara.

Mogućnost izmjene naziva Udarne grupe za borbu protiv terorizma biti će predmet razmatranja, baš kao i mogućnost formiranja Koordinacionog tijela za borbu protiv terorizma. Ta tačka je već dva puta skinuta sa dnevnog reda Vijeća ministara, a čini se da će tako biti i na današnjoj sjednici, prokomentirao je Mijo Krešić, zamjenik ministra sigurnosti BiH.

## Oduzimanje nadležnosti

Prijedlogu odluke o uspostavljanju Koordinacionog tijela za borbu protiv terorizma protivi se aktuelna vlast iz RS-a, uz obrazloženje da bi to tijelo preuzelo nadležnosti drugih nivoa vlasti.

- U odluci su stvari koje su protuzakonite. Ministar sigurnosti Dragan Mektić u toj odluci zamjenjuje glavnog tužioca BiH i on vodi to Koordinaciono tijelo. Tužilaštvu BiH se ne može oduzeti nadležnost u provođenju istraga, i to ne može raditi Ministarstvo sigurnosti i ministar Mektić - izjavio je Lukač.

Sastanku su prisustvovali najviši zvaničnici Tužilaštva BiH, Ministarstva sigurnosti BiH, **SIPA-e**, MUP-a FBiH, MUP-a RS-a, Policije Brčko distrikta, OSA-e, Službe za poslove sa strancima, Direkcije za koordinaciju policijskih tijela BiH i Granične policije BiH.

**N. POBRIĆ**